

Brčko Distrikt u Ustavu BiH



Supervizor za Brčko Distrikt dr Raffi Gregorian danas je srdačno pozdravio usvajanje Amandmana 1 na Ustav BiH kojim se u Ustav BiH dodaje Brčko Distrikt. On je takođe pozdravio polaganje zakletve od strane nove Vlade Brčko Distrikta.

“Usvajanjem amandmana i imenovanjem Vlade ispunjeni su važni uslovi da se ustanovi da institucije Distrikta funkcionišu ‘efikasno i po svemu sudeći trajno’”, rekao je Gregorian. “Ovo mi sada omogućava da se usredsrijedim na rješavanje raznih administrativnih i pravnih zadataka neophodnih za okončanje supervizije u skladu sa procesom koji je utvrđen u Konačnoj odluci”.

Ustavni amandman o Brčko Distriktu koji je usvojio Parlament BiH predstavlja važan korak u implementaciji obavezujuće arbitraže propisane Aneksom 2 Dejtona za rješavanje spora između entiteta oko područja Brčkog. Konačna odluka Arbitražnog tribunala donijeta je u martu 1999. godine.

Amandmanom se Brčko Distrikt dodaje u Ustav BiH, kako je definisano odlukama Tribunala i Distriktu se omogućava efektivno, direktno obraćanje Ustavnom sudu, a istovremeno se osigurava da nijedna strana ne može promijeniti status ili ovlaštenja Distrikta u odnosu na to kako su definisani arbitražnim odlukama.

Nova Vlada Brčko Distrikta položila je danas zakletvu pred Skupštinom Distrikta. Članovi Vlade svečano su se obavezali da će se pridržavati Ustava i zakona Bosne i Hercegovine, odluka Arbitražnog tribunala za Brčko, Statuta i zakona Brčko Distrikta i da će štiti interese Distrikta kao i jednakost i slobode svih građana Brčko Distrika.

“Ova Vlada Distrikta je, premda kasno, krenula dobrim putem”, rekao je supervizor danas. “Očekujem od nje da preuzme punu

odgovornost za dobrobit svih građana Brčkog”.